

Regale de Carcassonne,

Pour M^e. François de Roux, Licentié en Droit Canon & Civil,
Archidiacre en l'Eglise Cathedrale de Carcassonne, demandeur
en Regale.

Contre M^e. François de Simeon, pourueu par l'ordinaire, & M^e. François
de Baud, Indultaire.



'ARCHIDIAONE' contentieux ayant vacqué au mois d'Auril 1630. par le decedz de M. Raymond de Roux, il a esté diuerfement impetré: Par le demandeur, comme vaccant en regale: Par Simeon, comme vaccât par decedz: M^e. François de Baud, Indultaire y a pareillement porté sa pretention. De ces trois concurrents il eschet, premierement d'exclure M. François de Baud pour deux raisons. La premiere, que la dignité de la regale par sa noblesse esloigne toute concurrence, & ne reçoit son tiltre que de la main du Roy, qui n'a garde d'accorder les Indults au pre-judice de son droit de nomination en regale: L'autre, que l'Indult dudit de Baud se trouue à present remply de la Cure du lieu d'Arzens au diocèse de Carcassonne.

La contestation estant entre Simeon & le demandeur, deux questions sont à examiner. La premiere, si la regale commune à tout le Royaume est retranchée en la prouince de Languedoc, singulierement en l'Euesché de Carcassonne. La seconde, en cas que ledit Euesché y soit sujet, si lors du decedz de M. Raymond de Roux oncle du demandeur il y auoit ouuerture. De ces deux questions despend absolument la decision du differend d'entre les parties.

Pour le iugement de la premiere, le Roy & nos Seigneurs de son Conseil sont tres-humblement suppliés de considerer de quel temps la prouince de Languedoc a esté incorporée à ce Royaume, comme elle en sortie, & comme elle y est rentrée, pour ce que cela sert grandement à la decision de ceste question.

L'Histoire nous apprend, qu'apres la mort de l'Empereur Theodose enuiron l'an 424. Vbalia Roy des Visigoths, prenant part de la desroute de l'Empire, s'empara de la prouince de Languedoc: & qu'apres son decedz, Alaric son successeur establist le siege Royal de ses terres à Tolouse. Mais quelque temps après, Alaric ayant esté de-faict par le Roy Clouis en la bataille de Poitiers, tout le Languedoc fut uni à la Couronne de France du consentement de Iustin second, comme vne terre legitime-ment acquise sur vn veritable ennemy: & la plus-part des Euesques de ladite prouin-ce qui auoient esté chassez par Alaric Arrien, rappelez dans leurs premieres dignitez. Depuis les fils de Clouis ayât marié leur sœur Clotilde avec Amalaric Visigoth, la mes-me prouince luy fut donnée en douaire: Mais parce qu'Amalaric traittoit indigne-ment Clotilde, ses freres furent contrains de passer en Espagne, où ils desfirent Ama-laric, ramenerent leur sœur en France, & réunirent tout le pays du Languedoc à la Couronne. Si bien qu'il est constant que tous les Roys de la premiere & seconde ra-ces en ont depuis esté les Seigneurs absolus. Chilperic second, Thierry second, & Chil-deric troisieme, derniers Roys de la premiere race, y commandoient souveraine-

ment. Pepin, Charlemagne, Louys le Debonnaire, Charles le Chauue, & en suite les autres Roys de la deuxiesme race en faisoient de mesmes, & y establiſſoient des Gouverneurs qu'ils appelloient Comtes. Corſon y fut des premiers estably; & en ayant esté bien-toſt apres depôſé; Guillaume y fut mis en la place, auquel Beranguier ſucceda: à Beranguier, Raymond: à Raymond, Pons; & en ſuite tous les autres d'apres y furent establis par la ſeule autorité de nos Roys, iuſques au declin de la ſeconde race que ladite prouince fut ſouſtraite de l'oûeiſſance Françoisſe pendant les troubles & diuiſions ciuiles: Ce qui dura iuſques au regne du dernier Comte Raymond, qui maria Ieanne ſa fille vniue avec Alphonſe Duc de Poictiers, par le decedz deſquels ſans enfans, ledit païs a esté reûni à l'Eſtat.

Voilà ce qui regarde la prouince du Languedoc, & les diuerſes mutations qu'elle a receû.

De toutes ces remarques il ſe tire vne conſequence, que ſi en quelques Eglises de France la regale doit auoir lieu: C'eſt ſans doubte és Eueſchez de Languedoc, puis que les Eueſques ne tiennent ce qu'ils poſſèdent que par la ſeule grace & bien faiât de nos Rois:

Premierement le droit de regale eſt vn des plus anciens & plus auguſtes, d'ô iouiſſent nos Rois, nay avec l'Eſtat, par le moyen duquel ils ſe ſont reſerué la collation des benefices ſimples & perception du temporel des Eueſchez vacants: prerogatiue digne de la pieté de nos Rois, fondateurs, proteâeurs, & conſeruateurs des Eglises au dedans de leur Eſtat, avec choix & nomination portant neceſſité de prouiſion.

Secondement, il eſt conſtant par les Ordonnances de la plus-part des Rois de la troiſiesme race, ſingulieremēt par les lettres patentes de Charles IX. de l'année 1566. bien & deuēment veriſées, & confirmées par les Rois ſuccelleurs, & par vne infinité d'Arreſts, que le droit de regale eſt acquis à nos Rois par tout le Royaume, *N o v s auons dit, déclaré, voulu, ſtatué & ordonné, diſons, declarons, voulons, ſtatuons, & ordonnons, que doreſnauant & à cōmencer du 1. iour de Ianuier, tous & chascuns les fruits, profits, reuenus, & eſmoluens, prouenus, & qui prouendront des regales à nous appartenans en toutes les parties du Royaume, païs, terres, ſeigneuries & ailleurs qu'ad le caſe ſcherra, ſans aucun excepter ne reſeruer, ſeront conuerts & employez aux reparations & entretenement du diuin ſeruiſe de la ſaincte Chapelle & maiſons qui en dependent.* Philippe Probus, qui a traité des regales, exprofeſſo, dit, que Charles 9. declara lors la regale vniuerſelle par tout le Royaume, ſur le doute que quelques-vns faiſoient (comme l'on fait à preſent) ſi ce droit eſtoit généralement acquis à nos Rois. Le meſme auteur dit en la queſt. 2. *que ius regaliæ ad Regem Francia ratione ſua Corona pertinet non ſolum in vnâ Eccleſiâ Cathedrali, vel pluribus, ſed etiam in omnibus regni, & quod vna non debet eſſe plus excepta abeoiue quam alia, & ex conſequenti omnes Archiepiſcopi & Epifcopi Gallia prout nec alijs ſunt recipiendi ad allegadum contra ius ipſum exemptionem, preſcriptionem, uſum, aut poſſeſſionem in contrarium.*

En troiſiesme lieu, il ſemble qu'apres l'Arreſt de la Cour de Parlement de Paris, du 24. Auit 1608. rendu pour l'Eueſché de Bellay, il n'y a plus de lieu de diſputer au Roy ſon droit de regale: car on ſouſtenoit que Bellay eſtant de la Breſſe, de n'agueres vnie à la Couronne par le traité du mois de Ianuier 1601. n'eſtoit & n'auoit iamais eſté ſubjecte à la regale: Neantmoins ce celebre Parlement de Paris, qui maintient ſi puisſamment tous les droits de la Couronne, iugea ſuiuant les conſeſſions de Mr. l'Aduocat Seruin, que Bellay eſtoit ſubject à la regale comme tous les autres Eueſchez du Royaume, avec inhibitions & deffences aux Aduocats & Procureurs de faire aucune pourſuite, au contraire. Et quoi que quelques ignorans du ſiecle ayent trouué mauuais ceſte forme de prononciation, qui ennemis de l'autorité Roiale ont plus de ſoin de diminuer la puisſance des Rois pour la transferer à des puisſances eſtran-

geres, qui n'entreprēnent que trop sur les Libertez de l'Eglise Gallicane; Neantmoins il est vray que ceste prononciation ressent de la dignité & de la majesté d'un celebre Senat. Ainsi il se void dans le *Ioannes Galli*, en la quest. 88. tout à la fin vne prononciation pareille. *fuit prohibitum ne de cetero aliquis proijceret nisi partes principales, & quod aduocationem consularent de cetero contrarium.* Le mesme se trouue en la question 46. & en la question 168. *Aufrer.* en la decision 74.

De tous ces tesmoignages on conclud, que le droit de regale, qui est nay avec le Roiaume, estant vn des plus anciens & plus releuez dont iouissent nos Rois, & la prouince de Languedoc, vne des plus anciennes pieces qui composent le corps de la Monarchie Françoise, elle a esté sans doute des premieres subiettes à ce droit royal, dont elle ne se scauroit affranchir sans descharge precise: si bien que les Euesques de ladite prouince ne tenant ce qu'ils possèdent que par la seule munificence de nos Rois, ils ne se peuuent dire exempts du droit de regale, s'ils ne iustificient de l'exemption par escrit, & encore que ce soit à tiltre onereux; & que le Roi en accordant ceste exemption aye esté recompensé en autre chose. Ainsi doit estre entendu la responce du Roi au cahier des Estats de Languedoc cy apres objecté. Ainsi l'Euesque de Carcassonne peut demander d'estre conserué en ses priuileges, en cas qu'il se trouuera bien fondé: C'est ce qu'il faut examiner.

Passons à vn autre moyen. L'Histoire nous enseigne que les Comtes de Tholouse nommoient aux Eueschez,iferoient les Benefices, & en prenoient les fruiſts pendant la vacance: ce qui ne peut estre appellé qu'un pur droit de regale. Aussi ladite prouince ne fut pas plustost submise aux Rois de France, que par parentes du Roi Philippes le Bel de l'année 1303. elle fut declaree subiecte à ce droit (*volumus quod gentes nostre occupent regalia Ecclesiarum vacantium prouincie Narbonnensis*). ceste chartre est rapportee dans les Edicts de Fontanon imprimez es années 1580. 1585. 1607. par Guenois dans la Conference des Ordonnances, imprimées es années 1561. 1603. 1607. 1627. par *Aufrerus* dans son *Stilus Parlamenti*, imprimé es années 1512. 1530. 1542. dans autre *Stilus Parlamenti* commenté par Du Moulin, & imprimé es années 1550. 1558. & 1561. La mesme est rapportée par beaucoup d'autres auteurs: Mais parce que la citation en pourroit estre redieuse, il suffira d'auoir montré par les precedentes, que la supposition que le defendeur a faite sur ceste ordonnance en changeant V en N. & mettant *Nolumus* au lieu de *Volumus*, est tout à fait malicieuse, & contraire à l'intention du Roy, & qu'il est faux de dire, comme il dit dans vne longue requeste qu'il a presentée, que Probus, Pasquier, & Monsieur le Maistre, ayent iamais rapporté ladite chartre, & qu'ils parlent d'aucune exemption pour Narbonne & ses suffragants.

Ce dessus se peut encore mieux recognoistre par les parentes du Roy Charles V. de l'an 1373. adressées aux Seneschaux de Beaucaire, Carcassonne, & Tholouze, par lesquelles le Roy leur mandoit de contraindre tous les Prelats des Seneschauſſées de Beaucaire, Carcassonne & Tholouze à luy faire hommage & prester le serment de fidelité, auant lesquels nos Roys ont accoustumé de iouyr du temporel des Eueschez & conferer les benefices simples qui en dependent. *Archiepiscopis, Episcopis, Abbatibus, ceterisque; Prælati & alijs personis Ecclesiasticis in dictis seneschallijs constitutis* (qui ratione sua temporalitatis nobis recognitionem vel homagium facere tenentur, seu fidelitatis prestare sacramentum) *præcipiatis quod dicta recognitionem infra festum omnium Sanctorum nobis faciant præstentque fidelitatis iuramentum.* Le mesme Roy Charles par autres parentes du 4. Sept. 1375. où est attachée vne bulle comēçant *Gregorius*, donna à l'instance du Pape à P. Noguerests Archeuesque de Narbonne la iouissance tant du temporel que de la collation des benefices, nonobstant qu'il n'eust fait serment de fidelité. On adiouste à cela diuers contrats de composition pour le droit de regale faits & passez entre les Chanoines

de la saincte Chappelle, & les Euesques de Mande, du Puy, de Viuiers, de Lombés, & de Loudeue, tous Euesques de ladite prouince. Pour la regalle des Eueschez d'Agde, & de Beziers, les arrests & autres preiugez sont en nombre. Gregoire de Tours, liure sixieme, dit que le Roy a droit de regalle en l'Euesché d'V's. Du Haillan l. 3. de l'Estat des affaires de France, & plusieurs autres auteurs mettent entre les Eueschez subiets à la regalle, ceux de Castres & du Puy. Pour celuy du Puy, patentes sont en la chambre des comptes de l'an 1395. posterieures à vn arrest del'an 1258. sur semblable subiet. Pour celuy d'Alby, arrest du Parlement de Tholouze del'an 1396. rapporté par Maynard & Chopin. Pour celuy de Nismes, arrest du mesme Parlement du vingt-cinquiesme Decembre 1582. rapporté par Charondas. Ce sont tous Eueschez de Languedoc. Tellement que de toutes ces autoritez on tire vne consequence, que douter du droit de regale en la prouince de Languedoc, c'est estre ignorant dans l'Histoire, reuoker en doute le nom & la puissance du Roy, & se declarer ennemy de la Couronne & de l'Estat.

Des grandes prouinces dont le Royaume est composé, le Languedoc est vne des premieres submises. Le Dauphiné l'a suiuy, la Guyenne, la Champaigne, la Bretagne, la Bresse sous quels tiltres ces dernieres sont-elles obligées à la regale, le Languedoc demeurant affranchi, toutes estans esgalement subiettes à vn mesme Prince, Il n'y a rien de plus iuste que l'esgalité du traitement.

Communem hunc ergo populum paribusque regamus

Auspicijs.

Le droit general estant certain, il faut voir sous quelles raisons l'Euesque de Carcassone desire se soustenir: elles sont diuerfes, & les responces promptes.

L'on dit en premier lieu que par les termes de l'ordonnance *Dum Episcopus*, toutes Eglises ne recoiuent pas la regalle, vsant de ces mots, *Vbi Dominus Rex habet regaliā*: à quoy sont conformes les termes du traité fait avec les Ecclesiastiques en l'an 1606. lequel en outre porte que le Roy n'entend iouir du droit de regalle, sinon en la mesme forme que ses predecesseurs, sans l'estendre plus auant, au preiudice des Eglises qui en sont exemptes, repeté en l'article 16. des dernieres ordonnances, & que sur requeste présentée par les Euesques de Languedoc l'an 1627. il est dit que les Eglises de Languedoc iouyront de leurs priuileges.

A quoy responces diuerfes & certaines: premierement le droit de regale est vniuersel, n'a autres bornes que celles du Royaume, fondé sur des considerations generales qui ne sont point peculieres à quelques prouinces plus qu'aux autres. La negligence des Officiers en l'exaction ou execution n'y peut auoir apporté d'alteration. L'on ne prescrit (comme disoit cet ancien) contre les Dieux ny contre le public, la bonté de nos Roys ayant souuent ployé sous l'importunité auoit autrefois accordé quelques dispences de la regale, les Eueschez de delà la Loire s'en pretendoient exépts, ceux de Bordeaux representoient vn affranchissement de Louis le Jeune: mais comme les fleuues s'enslent & grossissent plus ils s'esloignent de leur source, les prerogatiues de l'estat se confirment & fortifient par le cours des années, l'experience maistrresse commune par diuersité d'inconueniens portant les esprits à des intelligéces nouuelles, la loy i. c. de bon. pet. sub. vsoit de termes elegans, *In nonnullis ita inuerecundā quorundam inhiatione constringimur, ut etiam non concedenda tribuamus*. Les troubles, les diuisions, les necessitez publiques donnent souuent ouuerture aux importunitéz & aux entreprifés: *Multa reges in bello presertim operis oculis donant, non sufficit homo iustus tot armis cupiditatibus*. Le calme & la bonnace donnent des ouuertures & resolutions souuent contraires, les yeux sillez sont ouuerts, la verité la liberté reclame contre l'erreur: c'est pourquoy ces concessions preiudiciables à l'estat immortel par subroga-

tion, dont les Roys n'ont que la dispensation comme tuteurs ont esté reuouquées, & enfin toutes les Eglises de delà le Loire, mesme celle de Bordeaux & tous les suffragans par arrest du 13. Iuillet 1596. y ont esté submises.

La prouince de Bretaigne ayant long-temps respiré sous ses franchises, enfin a esté liée à la condition cōmune. La Bresse à peine submise au sceptre en a receu la furcharge comme inseparable. L'Euesché de Langres nonobstant ses diuers priuileges confirmez de temps en temps a subi la mesme loy dès l'année 1625. & par reglement general du Parlement de Paris, deffences faites aux Aduocats de doubter que ce droit ne soit absolument acquis au Roy par tout son Royaume.

La regalle est vn bien domanial plus attaché à la Couronne que la lumiere au soleil. Nos Rois n'en sont qu'usufruitiers, obligez de le rendre en la mesme integrité qu'il leur a esté confié. Le fonds en appartient à l'Estat. Quand le Roy Iean se porta au delaissement de la souueraineté de Guienne, dans Froissart: quand le Roy Charles VI. se choisist vn successeur en l'Estat, la Noblesse du Royaume se roidit, soustint que les droicts eminents de la Couronne ne pouuoient estre cedez ny delaissez. C'est ce qui peut estre dit en cas semblable. Partant qu'il n'y a point d'exemptiō valable du moins qui puisse tirer consequence plus auant que le regne de celui qui l'a decernée.

Il est veritable que deux Eueschez se sont avec couleur voulu affermir cōtre la regle. Celuy d'Auxerre obtint du Roy Philippes Auguste exemption de la regale en recompense du delaissement de partie du Cōté de Gien. Celuy d'Amiens receut pareille prerogatiue, pour recompense du Comté d'Amiens, que le Roy n'a voulu recognoistre ny releuer de l'Euesché: Mais ce ne sont pas gratifications; ce sont eschanges qui ne peuuent estre aneantis que par le delaissement du contr'eschange. Et neantmoins ces Eueschez ont esté continuellement battus & agitez sous la consideration du priuilege en regale. Et en fin ont composé d'icelle avec la chambre des Comptes & la sainte Chapelle, sçauoir Auxerre le 19. Octob. 616. & Amiens le 3. Ianuier 628.

Et de quel pretexte peut s'affranchir le pais du Languedoc, qui faict de tout temps partie du Royaume? Ceste partie sera-elle reuestüe de cōditions diuerses de son corps? Le Languedoc est des premieres conquestes de nos Roys, longuement possédée par eux pendant quelques siecles par les Comtes de Thoulouse, par patentes de l'année 1361 vni au domaine public, & partant sous les conditions communes dont il ne se sçauroit affranchir en façon quelconque.

En second lieu, on dit qu'en l'année 608. le Parlement de Paris ayant déclaré la regale vniuerselle; en l'année 609. par patentes, les causes de ceste matiere furent tenues en surceance pour vn an. Ces patentes ne sont pas vn establissement ou resolutiō; ce n'est qu'une suspension momentanee: Aussi depuis par diuers arrests des années, 615. 618. 623. 24. 25. les regalistes de Languedoc ont esté maintenus és Eueschez de Beziers, d'Agde, de Lodeue, & autres.

En troisieme lieu, on dit que par vn registre de la Chambre des Comptes, il est dit que *intotā linguā occitanā Rex nihil habet*. Vn registre non composé des resolutions concertées pour tenir lieu de regles: mais contenant des opinions particulieres fortuitement & inconsiderément escrites, ne tiennent pas lieu de necessité. Monsieur le Maistre a remarqué que ce registre n'est pas en tout veritable. Car par exemple il dit, que le Roy n'a pas droit de regale à Limoges, & neantmoins par arrest de l'an 1272. enregistré dans le registre *Olim*, fol. 76. il y fut déclaré subiect, & les Euesques l'ont tousiours payé depuis. Il dit aussi que le Roy n'a pas droit de regale en Bretaigne, & neantmoins par arrests celebres elle a esté iugée pour Nantes, Vannes, Leon, & autres Eueschez de ceste prouince. Aussi est il certain qu'on n'a iamais adiousté foy audit registre: outre qu'il n'est là parlé, que de la regale temporelle, *terram & villas, & totam*

temporalitatem, en vn endroit. Et ailleurs, *De p[re]st[er]i auen[ie]nti computatum*, fuit, marquene fort bien cette verité. Or ici il est question de la regale spirituelle, dont on ne compte point aux Officiers du Roy: Car en la regale spirituelle, au lieu de prendre, sa Majesté donne & confere.

Mais dit-on par patentes du Roy Philippes de Valois del'an 1329. mainleuée fut donnée d'une saisie faicte en l'Euesché de Carcassonne, *quia non constat gentibus nostris quod predecessores nostri regis ibidem regalia habuerint temporibus retroactis*. Diuerfes responses.

Primò, que ce fut au mesme temps que Philippes de Valois fut fait Roi par deliberation des Estats de France, contre les pretentions d'Edouard Roi d'Angleterre son ennemi iuré, pour lors Duc de Guienne, & Seigneur de beaucoup de places du haut Languedoc, partant que ceste concession, aussi bien que plusieurs autres, pouuoit auoir eues considerations particulieres. *Secundò*, qu'il n'est là parlé que de la regale temporelle (le mot de *leuare fructus* le porte) & ici il est question de la regale spirituelle. *Tertio*, que le doubte est remis, non sur le droict, mais sur l'ignorance de la Chambre des Comptes, non encores instruite de l'vsage receu en la prouince, laquelle pendant quelques siecles auoit esté possédée par des Seigneurs particuliers, & ne fut reunie que trente-deux ans apres ladite mainleuée, ainsi qu'il appert de l'acte de reunion del'an 1361. C'est pourquoy il ne faut pas trouuer estrange si sous Philippe de Valois, le regne duquel fut long temps auant ladite reunion, la Chambre n'estoit pas suffisamment esclaircie. Outre que la patente ne porte pas exemption: mais vne surceance mal à propos neantmoins ordonnée, veu celle du Roy Philippe le Bel de l'an 1303. Aussi le mesme Philippe de Valois par vne ordonnance, qui est de cinq ans apres ladite main-leuée, & qu'on trouue dans la Conference des Ordonnances sur le faict des regales, §. 2^e. declara que le droict de regale spirituelle (dont il est ici question) lui appartenoit, sans exception & limitation quelconque. Et le Roy Charles V. donna ans apres la reunion de Languedoc à la Couronne, declara par patentes des années 1373. & 1375. ci dessus rapportées, que le droit de regale lui appartenoit es Seneschauffées de Beaucaire, Carcassonne. & Tholouse.

Après que le defendeur a veu les principaux fondemens de sa cause renuersés, il a eu recours à d'autres moiens, & par vne longue requeste, il s'est efforcé de remonstrer qu'il y a quelque deffaut es capacitez du demandeur. *Primò*, il dit, que lors que ledit le Roux a esté pourueu en regale il n'estoit pas Bachelier en Droict Canon, & ne l'est pas encore, n'estant que simple Licentié (ce sont les mesmes termes de la requeste.) *Secundò*, que lors que ledit de Roux a esté pourueu, il n'estoit pas en aage, & que pour posseder ledit benefice il faut auoir quelque Ordre sacré. *Tertio*, le defendeur rapporte vn denombrement des benefices que l'Euesque de Carcassonne a conferez depuis qu'il est en possession dudit Euesché, sans qu'aucun regaliste se soit mis à la trauerse, dont il conclut qu'il est à presumer que c'estoit à l'Euesque seul à conférer les benefices, & non pas à sa Maiesté.

Mais ce premier moyen est si impertinent, qu'il ne merite point de response, n'estant pas moins ridicule que si l'on soustenoit que le defendeur n'est pas tonsuré, parce qu'il n'est que simple Prestre: Les plus grossiers scauent que les licences presupposent le Baccalaureat: Et le demandeur soustient, comme depuis long-temps, il est Bachelier en Droit Canon, & Civil, & que plus d'un mois auant qu'il fust en possession dudit Archidiaconé, il auoit pris ses licences, partant que de ce costé-là il n'y a point en tout de deffaut.

Quand au second moyen, les responses en sont bien promptes, *primò*, que ledit de Roux à plus de vingt ans, partant capable d'estre promeu aux Ordres Sacrez, que par la disposition du Droict, ceux-là mesme qui sont pourueus des benefices Curez

ont l'an & iour pour se faire promouuoir aux Ordres Sacrez, à commencer du iour de la paisible possession; que l'Archidiaconé estant vn benefice simple, la mesme grace ne scauroit estre refusée en iustice au demandeur. *secundò*, que par Arrest de l'an 1599. le Grand Conseil iugea qu'un ieune enfant de dix à douze ans seulement, estoit capable de tenir vne Prebende en l'Eglise Metropolitaine de Rouën, que depuis on la tousiours pratiqué de la sorte: qu'à present vn ieune garçon de 13. à 14. ans se trouue pourueu d'un Archidiaconé en l'Eglise Metropolitaine de Tholouse. Outre que les Docteurs qui ont traité des Regales, tiennent que pour le regard des benefices vacants en Regale, moindre aage; Voire celuy de sept ans suffit, ainsi qu'expressément l'a décidé *Rufus tractat. de iure regal. priuil. 24.* Et puis qu'il est veritable que le Pape peut dispenser vn enfant de cet aage-là, pour tenir quel benefice simple que ce soit. Il n'y a point de doubte que sa Maiesté n'en puisse faire de mesme, puis que, *vicem gerit Pape* pendant l'ouuerture de la Regale.

Quand aux collations des benefices que le defendeur allegue auoir esté faites par l'Euesque de Carcassonne, il n'en peut tirer aucune sorte d'auantage, parce que la plupart d'iceux sont des benefices Curez qui ne tombent iamais en Regale, & le peu des simples que ledit Euesque a donnez estoient de si petit reuenu, que personne ne s'est mis en peine de les demander au Roy: Outre que c'est vne maxime receüe en matiere de Regalle, & confirmée par les Ordonnances & Arrests, que la souffrance ne donne point de droit aux Euesques, & il faut estre ennemy de Roy, & de la Couronne, pour soutenir que le Roy perde vn droit si auguste à faute d'auoir esté requis.

CE n'est pas assez d'auoir fait voir que l'Euesque de Carcassonne n'est point exempt de Regale, il faut monstrier que lors du deceds de *M^r Raymond de Roux*, & provision en Regale dudit Archidiaconé, en faueur de *M^r François de Roux* son nepueu, elle estoit ouuerte audit Euesché, & qu'au Roy seul appartenoit la collation des dignitez & prebendes.

Premierement, il est tres-assuré que la Regale estant vn droit des plus releuez, & des plus augustes de la Couronne; Elle a des prerogatiues qui lui sont peculieres, comme d'estre inalienable, incessible, imprescriptible, de ne receuoir fiction quelconque d'estre ouuerte par le moindre deffaut de formalité qui se peut trouuer es titres & capacitez d'un nouveau Euesque, en l'ordre qui doit estre obserué comme essentiel, tant en la mise de possession, & prestation du serment de fidelité, qu'en l'enregistremēt d'iceluy en la Chambre des Comptes de Paris, & obtention d'arrest de main-leuée de ladite Chambre, & vn nombre infini d'autres preeminances, rapportées par les Auteurs qui ont traité de la Regale.

Il est aussi veritable que par le concordat, au titre de *regia ad prelaturam nominatione faciendā*, par l'Ordonnance de Blois, Declaration & Ordonnances du Roy, de l'année 1629. confirmées par vne infinité d'Arrests, les nōmez par sa Maiesté aux Archeueschez & Eueschez sont obligez de retirer leurs Bulles de Rome neuf mois apres leur nomination, à peine de deschoir dudit droit de nomination, & collation des benefices, quand mesmes il y auroit vn breuet à eux accordé pour ce suiet. Neantmoins *M^r Vital del'Estang* à present Euesque de Carcassonne ayant esté nōmé coadiuteur audit Euesché, par breuet du 28. Mars 1611. demeura dans vne negligence de trois ans entiers sans faire expedier lesdites bulles; ainsi qu'il appert del'acte de sa mise de possession, ce qui est vn deffaut d'autant plus considerable, que le droit de regalle est priuilegié, & Sacro-sainct, au preiudice duquel il n'y a point d'obmission qui ne porte nullité.

Mais ce qui est en beaucoup plus fors termes; c'est que lesdites Bulles furent expedices sur vne procuration passée depuis trois ans; Et puis qu'il est dans l'usage, que toute procuration (*ad resignandum*) par le laps d'un an demeure nulle, & comme non

aduenuë les Bulles interuenues sur ce fondement, nul estant relatives & accessiores à vne procuration inualide, suivent sans doute la nature de leur principal, & ainsi les choses reduites au cas de la maxime, *que ab initio non valuerunt tractu temporis non conualescunt*, non plus que tout ce qui a esté fait en suite desdites Bulles, principalement quand à la collation des benefices.

Secondement on void par la mise de possession dudit Euesque, que s'estant presenté en l'année 1621. au chappitre de l'Eglise cathedrale de Carcassonne, pour estre receu & installé audit Euesché, attendu le deceds de son deuancier, il asseura que bulles luy en auoient esté expediees le 9. Februrier 1615. Et cependant on void par vne coppie d'une lettre dudit Euesque du 6. Auril en la mesme année (qui est de deux mois après) comme pour lors seulement, Il donna charge au Sr. Eschinard banquier de Rome, de luy faire expedier lesdites bulles: ce qui est vne contradiction manifeste, & vne pure supposition, pour se pouoir introduire avec plus de facilité que de iustice en la pretenduë possession dudit Euesché.

En troiziesme lieu le Conseil est tres-humblement supplié de considerer qu'il est dans l'ordre & dans l'usage les bulles expediees se retirer pardeuers les Commissaires deputez par sa Sainteté, & qui sont tousiours denommez en icelles bulles, pour proceder à la fulfilmination d'icelles recevoir le serment du futur Euesque, & iceluy instituer en la possession legitime del'Euesché, en vertu desdites bulles, qui verifient ces mors, *legitimè intrans*, couchez dans la constitution *Dum Episcopus*. Et tant s'en faut que ces formalitez essentielles y ayent esté suiues & obseruées, qu'au contraire sans auoir ledit Sieur Euesque lesdites bulles en main, & sans nulle sorte de formalité de Iustice, croyant par vne voye illicite & condamnée par les saincts decretz frustrer sa Maiesté tant du droict de la regalle temporelle que de la collation des benefices, il se seroit intrus de son seul mouuement & propre autorité en la pretenduë possession, Et en consequence del'intrusion deuenue à iamais incapable de pouoir conferer les benefices qui dependent dudit Euesché. La preuue de tout cecy se tire tant de sa mise de possession qui est du vnzième Aoust 1621. où il n'est point en tout parlé desdites bulles, quoy qu'elles fussent l'acte principal, en vertu duquel seulement il pouuoit estre legitimement receu; qu'aussi des lettres escrites par ledit Eschinard plus d'un an apres ladite mise de possession, par lesquelles il asseuroit auoir encore lesdites bulles en main, ensemble d'une procuration faite en suite par le mesme Eschinard à Maistre Pierre le Conte Banquier de Paris, pour contraindre ledit Euesque à luy payer les sommes qu'il auoit exposées pour l'expeditio desdites bulles. auquel le Contre ledit Euesque escriuit le 28. Iuin 1623. & s'obligea de satisfaire au plustost ledit Sieur Eschinard, & retirer les bulles de ses mains.

Ceste façon de proceder sembleroit en quelque façon receuable, si pour quelque cause legitime la mise de possession eust esté faite d'autorité de Iustice, ainsi que fit autrefois l'Euesque de Constance, auquel neantmoins par arrest de l'an 1611. donné au Parlement de Paris, il fut enioin& de prendre vne nouuelle possession en vertu des bulles. Il y auroit aussi lieu de s'excuser en quelque sorte, si lors il y eust eu desfenfes de retirer des bulles de Rome, ainsi qu'autresfois il arriua aux Archeuesques de Rouën & de Reims, à l'Euesque de Beauuais & autres, lesquels pendant les defences s'estans mis en possession de leurs benefices sous le bon plaisir du Roy en vertu d'un arrest du grand Conseil, en reprirent neanmoins vne nouuelle, & firent nouveau serment de fidelité apres auoir retiré lesdites bulles, & iusques à l'enregistrement de ce dernier serment & mainleuee de la chambre des Comptes de Paris la regale fut censée tousiours ouuerte en leurs eueschez. Or au fait de l'Euesque de Carcassonne on void clairement qu'il n'y auoit point en tout d'empeschement de retirer

les Bulles, la porte de Rome estant pour lors ouuerte à tout le monde; & neantmoins la mise de possession se trouue faicte sans icelles, & sans nulle autorité de Iustice: Il s'ensuit donc quelle ne peut estre soustenuë legitime; Et par consequent qu'il n'a peu pouruoir legitiment aux benefices.

Mais dit-on, les Bulles estoient expediees lors de la mise de possession, & quand l'Euesque de Carcassonne a pourueu au benefice contentieux, il les auoit retirées de Rome: Deux responces.

Primò, qu'il est vray que les Bulles expediees, l'Euesque se pouuoit dire en quelque façon bien pourueu, & c'est ce qu'on ne luy dispute point: On dit seulement qu'il n'est pas encores entré legitiment en la possession dudit Euesché, puis que ce n'a pas esté en vertu de ses Bulles, ce que neau moins estoit absolument necessaire: veu la nullité de la premiere, faite sans tiltre canonique, & sans nulle autorité de Iustice.

Secundò, que si l'on soustient que depuis les Bulles ont esté retirées, cela ne couste en façon quelconque; Outre qu'il faudroit en rapportant les preuues certaines de ceste proposition, faire voir pareillement comme en vertu desdites Bulles, vne nouuelle mise de possession a esté faite, & c'est ce qu'on ne scauroit monstrier. Que s'il est vray qu'un Euesque resignant peut tousiours conferer legitiment les benefices despendans de son Euesché, iusques à ce que le resignataire en ait pris possession en vertu de ses Bulles, & qu'il les ait signifiées à son resignant, *ut resignanti debent enim nota esse resignanti* (comme on dit en droit) *notum Iudici ut Iudici. in l. hac autem. §. non deffend. ff. quibus ex causis in pos. cat. Bart. in l. multum de condit. & demonst. Cardinal. in Clement quest. 241. C. si duob. de appell. decius Consil. 295.* Ainsi qu'il fut iugé au Parlement de Tolouse, & qu'il est rapporté dans les Arrests de Maynard; A plus forte raison le Roy qui releue beaucoup par dessus les Euesques, & qui en ceste occasion est censé l'ordinaire des ordinaires, a peu conferer ledit Archidiaconé, puis qu'on fait voir clairement qu'il n'y a point de mise de possession canonique audit Euesché, que les bulles n'ont iamais esté presentées à la Maisté, & qu'il est veritable qu'immédiatement après le deceds d'un Euesque, *succedit rex loco boni, & legitimi administratoris in omni temporalitate conferetq; beneficia non curata*, iusqu'à ce que le nouveau Euesque ait satisfait à toutes les conditions necessaires pour clorre la Regalle.

Passons à vn autre moyen d'ouuerture de Regale, on demeure d'accord qu'un serment de fidelité fut fait par ledit Euesque le 24. Iuin 1615. Mais on soustient aussi que ce serment est nul pour trois raisons fort pertinentes. La premiere, que ledit serment ne pouuoit estre presté que premierement les Bulles ne fussent retirées de Rome, & que la mise de possession n'eust esté faicte en vertu d'icelles, cet ordre graduel faisant partie de l'essence de la Regalle, laquelle seroit quasi momentanée, & n'auroit iamais son effect sans l'observation de ces formes. La seconde, que ledit serment fut presté pour un Euesché, dont M^{re} Vital de l'Estang n'estoit pas encore possesseur, puis que le resignant vescu six ans après, tellement qu'ayant esté presté tant seulement pour pouuoir exercer licitement l'Office de Coadiuteur audit Euesché (ainsi qu'on void par l'acte de la prestation de son serment) ledit Vital de l'Estang en qualité de vray titulaire, & legitime possesseur, estoit obligé à nouveau serment de fidelité, *tam ratione feudi quam ratione multitudinis personarum*, desquelles il commença d'estre censé le vray Pere Spirituel, & Pasteur dès le iour du deceds de son resignant. La troisieme, que s'il est vray que ledit Euesque ait retiré ses bulles de Rome depuis l'année 1623. (car on a dessus monstrier qu'aduant ce temps-là il ne les auoit point en main.) Il est aussi certain quelles ne lui auoient esté expediees qu'à ceste condition, qu'il presteroit le serment de fidelité au Pape pour raison dudit Euesché, entre les

maines des Commissaires deputez pour ce ſuieſt, & ſeroit par ce moyen deuenu vray homme, & ſubieſt du Pape, & par cōſequent le ſerment allegué n'ayant eſté fait qu'en l'année 1615. il falloit neceſſairement reïterer la promeſſe de fidelité au Roy apres la reception deſdites Bulles, *ut per homagium principi de nouo præſtandum, quaſi de nouo homo regi reſtitueretur.*

Et c'eſt la raiſon pour laquelle le Parlement de Paris par Arreſt du 13. Aouſt 1598. rapporté par Seruin, adiugea l'Archidiaconé du grand Caux à Iean Buillon regaliſte, pour auoir vacqué auant que l'Archeueſque de Rouën euſt reïterer ſon ſerment de fidelité qu'il auoit preſté auant l'enuoy & reception de ſes bulles, quoy que ledit Archeueſque fuſt fort excuſable, veu les deffences qui eſtoient pour lors d'aler à Rome, & que d'ailleurs il euſt auparauant ſatisfait à tout le reſte, ayant fait enregiſtrer ſon premier ſerment, compoſé avec la Chambre des Comptes, & la ſaincte Chapelle, & obtenu Arreſt de main-leuée, meſme pris vne nouuelle poſſeſſion en vertu de ſes bulles, auant que le regaliſte fuſt pourueu par le Roy dudit Archidiaconé.

De tous ces manquemens ont conclud avec raiſon, fondée ſur l'Ordonnance & l'vſage, & confirmée par vne infinité d'Arreſts, & par la maximé priuilegée en matiere de regale, quelle eſt ſans doute encores ouuerte en l'Eueſché de Carcaſſonne.

Mais quand tous ces moyens cy-deſſus alleguez ne ſeroient pas receus, pour faire voir plus clairement ceſte verité, & fermer la bouche à la partie aduerſe; Le deffaut d'enregiſtrement du ſerment de fidelité en la Chambre des Comptes de Paris, & de l'Arreſt de main-leuée du temporel, faiſi de l'autorité de ladite Chambre, & de celle de Montpellier, ſont des moyens plus que ſuffiſants pour monſtrer l'ouuerture de la regalle audit Eueſché, car il eſt bien veritable que le deſendeur rapporte vn ſerment de fidelité fait par ledit Eueſque de Carcaſſonne: Mais quand on n'auoit pas monſtré la nullité dudit ſerment, il falloit de neceſſité pour faire voir la cloſture de la regalle, que le deſendeur rapportaſt l'enregiſtrement d'iceluy ſerment en la Chambre des Comptes de Paris, avec l'Arreſt de main-leuée du temporel faiſi: enſemble l'acte de preſentation faiſi au Receueur Commis à la perception des fruiſts de la regale de l'expedition de ladite Chambre: Et neantmoins contre l'ordonnance & l'vſage, ces trois dernieres conditions ceſſent tout à fait, iagoit que le principal effort de la queſtion dont il s'agit ne tombe que ſur ces points. Or que ce ſoit contre l'Ordonnance on le void clairement en celles de Charles le Bel, & de Philippe de Valois; Et la conſtitution *dum Episcopus*, qui eſt ceſte Ordonnance celebre, qui regle le fait des regales, dit que, *Regalia debet v̄gere & habere locum in dicto Episcopatu donec & quousque futurus successor Episcopi legitime intrans debitum fidelitatis iuramentum dicto Domino nostro regi, pro vi tenetur fecerit, quodque littera regia attestantes dictum iuramentum sic fuiſſe factum preſentata, regiſtrata & expedite fuerint in Camerâ computorum, & quod receptor ſeu commiſſarius ad receptum ipſius regalię receperit mandatum à dictâ camerâ emanatum per quod ei mandetur vt leuet manum regis & permittat dictum Episcopum vti & gaudere ponendo, ipſam temporalitatem ad plenam liberationem nec ante receptionem huiſmodi mandati reputatur regalia clauſa ſed vſque ad diem ipſius receptionis tenetur reddere computum & rationem de fructibus huiſmodi temporalitatis, & confert rex beneficia non curata tanquam in regaliâ vacantiâ, & hoc de iure & conſuetudine regis & ſugorons Francie.* On dit auſſi que c'eſt contre l'vſage, pource que le Parlement de Paris a touſiours iugé ledit enregiſtrement & main-leuée abſolument neceſſaires par arreſt du 13. Aouſt 1598. conformement à quatre autres arreſts des années 1350. 1430. 1571. & 1582. rapportez par la plus-part de ceux qui ont traité des regales. Le meſme fut-il iugé au Parlement de Normandie le 9. Mars 1625.

Il eſt vray que depuis il y a eu deſignorans qui ont voulu pretendre que le ſeul ſer-

ment de fidelité faict entre les mains du Roy suffisoit, pour fermer la regale, comme en matiere feodale la foy & hōmage prestés au Seigneur empeschent que le Seigneur ne puisse faire les fruičts siens depuis la foy & hōmage: mais le mesconte qu'il y a est, que le serment de fidelité n'est point parfaict pour valoir foy & hōmage qu'il ne soit venu en la connoissance des Officiers du Roy, & qu'il ne soit enregistré: & cela, afin que le nouuel Euesque soit mis en possession de son Euesché par les officiers du Roy, ainsi il se void au Canon *Adrianus sexagesimā tertiā dist. nōtione*, où parlant des inuestitures des Euesques il dit, *Iusques à ce que l'Euesque soit inueſty de son Euesché par le Roy, il est defendu à ses confreres de les consacrer*, & ceste possession n'est point accordée par le Roy, mais par ses officiers. Dequoy *Ioannes Andraas*, aux Additions sur le *Speculator*, au tiltre *De legatis*. §. *nunc tractemus, versiculo sed nunquid legatis*, dit que, *Rex Francie in hoc habet priuilegium quod praelati sui accipiunt temporalia per manus suas*, ce qui est rapporté au chapitre *generali de electione in sexto*: & demeure confirmé par vne patente du Roy Philippe le Long, du premier Octobre, enregistrée aux Comptes le 29. Octobre 1321. dont l'intitulation est telle: *Philippus Dei gratia Francorum & Nauarre Rex, dilectis & fidelibus nostris gentibus computorum Parisensium, custodibus legaliarum nostrarum, salutem & dilectionem*. Là où il leur mande de bailler main-leuée à l'Euesque de Paris de son temporel, parce qu'il auoit esté receu par luy à foy & hōmage. Il faut donc auparauant qu'un Euesque se puisse dire tel; qu'il en puisse faire les fonctions, receuoir les fruičts, & entre iceux la collation des benefices, qu'il soit mis en possession de son Euesché par les Officiers Royaux.

Ceste maxime est si veritable, que la question s'en estant présentée au Parlement de Paris pour l'Euesché de Leon, dont l'Euesque dès l'année 1613. auoit faict serment de fidelité au Roy, l'auoit faict enregistrer en la chambre des Comptes de Nantes, en conséquence des lettres patentes du Roy; toutefois la cause ayant esté traictée au Conseil, & renuoyée au Parlement; par arrest du 18. Aueil 1624. faute d'auoir par ledit Euesque faict enregistrer son serment de fidelité en la Chambre des Comptes de Paris, & obtenu mainleuée de ladite Chambre, la regalle fut declarée ouuerte, & par vn reglement general, afin que l'on ne doutât plus de la question, il est dit, que la regale ne pouuoit estre clause, que les Euesques ne rapportent le serment de fidelité au Roy, enregistré en la Chambre des Comptes de Paris, avec la main-leuée de ladite Chambre des faictes des fruičts: Apres lequel arrest, qui n'est que l'explication de l'Ordonnance, ce feroit abuser de la patience du Conseil de s'arrester dauantage en la preuue de ceste maxime. C'est l'opinion de Monsieur Ruzé, priuil. 38. art. 1. de Probus, quæst. 53. de Monsieur le Maistre en son Traicté des Regales. c. 5. de Monsieur Seruin en ses Arrests, de Monsieur le Bret en ses Decisions, & en son liure de la Souueraineté du Roy, & generalement de tous ceux qui ont escrit de la regalle.

Contre laquelle maxime generale l'on oppose vn Arrest que l'on dit auoir esté rendu le 21. d'Aueil 1628. sur les conclusions de Monsieur l'Aduocat general Talon, par lequel pour l'Euesque d'Angers l'on dit auoir esté iugé que le seul serment de fidelité suffisoit sans l'enregistrement en la Chambre des Comptes, & sans la main-leuée des fruičts, & sous pretexte que cest arrest est mal dressé, où l'on a faict parler Monsieur Talon, l'Aduocat general, vn langage contraire à ses sentimens, & aux propositions qui auoient esté tenuës en l'année 1624. lors de la contestation pour les Eueschez de Leon, de Beziers, d'Agde, & autres. L'on vouldroit aujourd'hui se seruir de cest arrest pour renuerſer les maximes les plus certaines de la regale.

Mais pour monſtrer que ce qui est inseré dedans le plaidoyé de Monsieur l'Aduocat general Talon n'est pas ce qu'il a plaidé, le Conseil remarquera, s'il luy plaist, que des l'année 1588. Mr. Charles Miron a esté pourueu de l'Euesché d'Angers à la nomination

du feu Roy Henry III. il en a fait le serment de fidelité le 27. Septembre de la mesme année, obtenu lettres patentes le 1. d'Aoust audit an, ensemble arrest de la Chambre des Comptes portant enregistrement & main-leuée en datte du 28. Septembre audit an 1588. l'on suppose donc que Monsieur l'Aduocat general ait plaidé ce qui n'estoit pas, puis que l'on dit qu'il n'a point fait enregistrer son serment de fidelité, & neantmoins l'Arrest de la Chambre des Comptes porte son enregistrement & la main-leuée. Quand donc l'arrest de 1628. est interuenu, ce n'a pas esté sur la question de sçauoir si le deffaut d'enregistrement du serment de fidelité faisoit ouerture de la regale ou non, c'est vne maxime trop triuiale & trop certaine dans le Parlement, & puis que le serment de fidelité de Monsieur Miron a esté enregistré il y a plus de quarante ans pour l'Euesché d'Angers estant mort le Doyen des Euesques de France, il ne peut pas tomber sous le sens commun que l'on aye contesté ce point dont la preuue est si certaine & si concluante, veu mesmes que dans l'arrest il n'est point parlé de ce qui auoit esté iugé pour Leon en la mesme question, quatre ans auparauant, ce que l'on n'eust pas obmis si ç'eust esté le point important de l'affaire: car Monsieur Miron en l'année 1616. ayant fait diuorse avec son Eglise d'Angers & s'en estant demis en faueur de Monsieur de la Varenne, depuis Monsieur de la Varenne estant decedé, le Roy ayant trouué bon que Monsieur Miron se remist & se restablist avec son Eglise, il fut vne autrefois pourueu de l'Euesché en l'année 1622. & lors l'on disputa si par le moyen de ce reestablissement il estoit obligé faire nouveau serment de fidelité, & obtenir nouvelle main-leuée; c'estoit là la question qui estoit à iuger, en laquelle toute la defense de ceux qui empeschioient la regale fut de dire que l'Episcopat estoit vn mariage spirituel entre celui qui estoit consacré Euesque & l'Eglise qui luy estoit ordonnée de deseruir, que quand il l'abandonnoit c'estoit vne diuorse qu'il faisoit avec son espouse legitime, que si par fortune il estoit rappellé en la mesme Eglise *redintegratum erat matrimonium*, & ainsi tout ce qui s'estoit fait pendant le temps du diuorse s'esuanoüissoit & n'estoit pas considerable, & les choses estoient presumées estre au point qu'elles estoient auparavant qu'il en eust diuert, suiuant ceste belle loy 3. *de pactis dotalibus, pacta conuentia que in diuorij tempus collata sunt redintegrato matrimonio locum non habent*, qu'ainsi quand Monsieur Miron auoit esté redonné à son Eglise, il estoit presumé n'en auoir iamais diuert, & pour ceste raison n'estoit obligé à nouveau enregistrement & main-leuée de la Chambre des Comptes. Ce furent là les veritables motifs sur lesquels fut donné l'arrest d'Angers de l'an 1628. Outre, qu'il y a vne difference en ceste affaire grandement considerable en ce que le temporel de l'Euesché d'Angers n'auoit pas esté saisi, partant la main-leuée eust esté inutile. Ce qui ne se rencontre pas en l'Euesché de Carcassonne, le temporel duquel est saisi à present de l'autorité de la Chambre des Comptes de Paris, & de celle de Montpellier: de sorte que de vouloir se seruir de l'arrest d'Angers pour induire qu'un Euesque n'est point obligé en quelque temps que ce soit de faire enregistrer son serment de fidelité: c'est contre l'autorité de l'arrest mesme: & contre la maxime certaine & arrestée dans le Parlement de Paris, qui est le seul lieu où les regales se iugent.

Le defendeur ne veut pas encore donner les mains, & employe pour vn dernier moyen la possession plus que triennale del'Euesque de Carcassonne, dont il conclud que ledit Euesque à peu iouir du benefice de l'Edict de l'an 1606. & par cōsequent conferer legitiment la dignité contentieuse: Mais comme peut-il soustenir que ledit Euesque est triennal possesseur, puis qu'il est vray qu'il n'a iamais pris aucune possession legitime: & quand bien il l'auroit prise, le defendeur se trompe grandement, disant que ledit Euesque pouuoit iouyr de la grace de l'Edict: car il est bien asséuré que l'Edict de l'an 1606. & l'ordonnance de l'année 1619. portent, que si quelqu'un se

trouue pourueu canoniquement d'un benefice par l'ordinaire, & qu'il en ait iouy l'espace de trois ans entiers, ne pourra estre troublé par aucun regaliste: mais on le desie de monstreraucun Edict, Ordonnance, ou Arrest qui dise qu'un Euesque fut-il possesseur de vingt ans, s'il n'a satisfait à tous les poincts requis pour la closture de la regale puisse donner les benefices simples au preiudice du droit que le Roy a de les conferer, *sufferentia enim non tollit regalia quoad collationem beneficiorum* dit l'ordonnance de Philippes de Valois, enregistree depuis plus de trois cents ans en la Châbre des Comptes de Paris: & pour faire voir plus clairement ceste verité, voicy l'article 27. de l'Edict, sur lequel le demandeur fonde son droit, *Estant deuement informez de plusieurs desordres aduenus à cause qu'és vacations en regale le droit d'y pouruoir, qui nous appartient, a esté pratiqué par nos predecesseurs, & par Nous, iusques à trente ans. Et par ce moyen les possesseurs qui en auoient iouy à autre tiltre par plusieurs années en estoient euincez par celuy qui estoit pourueu de nouveau en vertu de la regale. Voulans faire cesser lesquels abus, à la diminution mesme de nos droits, Ordonnons que les titulaires qui auront esté pourueus canoniquement, & iouy paisiblement trois ans entiers & consecutifs desdits benefices ne pourront apres estre inquiétez sous pretexte des prouisions en regale, que declarées en ce cas de nul effect & valeur. Le mesme est rapporté dans l'Ordonnance de l'année 1629. art. 16. en ces termes, Voulons que celuy qui aura esté pourueu d'un benefice par le Collateur ordinaire, & iouy d'iceluy paisiblement l'espace de trois ans, du iour de la prise de possession, ne puisse estre troublé ou inquiété en vertu de nostre collation, suiuant l'Edit sur ce fait par nostre tres-honoré Seigneur & Pere en l'année 1606. au mois de Decembre. Par lesquels articles on void clairement que là il n'est point en tout parlé des Collateurs ordinaires: mais seulement des pourueus par eux, ou en Cour de Rome pendant l'ouuerture de la regale, en faueur desquels cet article fut inseré dans l'Edit, sur les plaintes qu'on fit à sa Maiesté des vexations que les regalistes faisoient à des beneficiers pourueus depuis plus de quinze ou vingt ans, à cause quel'Ordonnance de Louys XII. estendoit la regale à trente ans. La preuue de tout cecy se tire tant des propres termes de l'Edit & Ordonnances, que de quantité d'Arrests du Parlement de Paris, singulierement de celuy qui fut donné contre l'Euesque de Leon, lequel ayant fait enregistrer son serment de fidelité en la Chambre des Comptes de Nantes en l'année 1613. par Arrest de l'an 1624. la regale fut declaree ouuerte en son Euesché, & vne prebende de l'Eglise Cathedralle dudit Euesché adiugee à vn regaliste, pour n'auoir esté ledit serment enregistré en la Chambre des Comptes de Paris. Ce qui n'auoit pas esté iugé de la sorte, si ce que le demandeur met en auant auoit lieu, puis que ledit Euesque estoit en possession depuis vnze ans entiers, cela doit estre ainsi, le defendeur ne peut tirer aucun aduantage des susdits Edict & Ordonnances, puis qu'il n'est pas triennal possesseur, sa prouision estant de la mesme année que celle du demandeur, & qu'il est vray que iusques à la prestation du serment de fidelité, Enregistrement d'iceluy en la Chambre des Comptes à Paris, & obtention de main-leuee, aucun Euesque ne peut conferer les benefices simples au preiudice de sa Maiesté.*

Donc ayant fait voir quel'Euesché de Carcassonne est subiect à la regale, & que la mise de possession sans tiltre canonique, les defaüts de nouvelle prestation de serment de fidelité, d'enregistrement d'iceluy en la Chambre des Comptes de Paris, & de l'obtention de mainleuee du temporel saisi font l'ouuerture en regale; il n'est point difficile de monstrier que le benefice contentieux a vacqué en regale.

Il est constant que le 11. du mois d'Aoust 1611. Messire Vital de l'Estang fut intrus par sa propre authorité dans la possession de l'Euesché de Carcassonne, & qu'au parauant en l'année 1615. auant l'enuoy & reception des bulles, il presta vn serment de fidelité au Roy en qualité de coadiuteur, & non pas comme vray titulaire dudit Euesché.

elié: Il est pareillement certain que iamais Mr de Carcassonne n'a fait enregistrer aucun serment en la Chambre des Comptes de Paris n'a point obtenu d'Arrest de mainleuee, en vn mot na point esté mis en possession de son Euesché par les Officiers Royaux; Et par consequent à l'esgard du Roy, aussi bien qu'à l'esgard du Pape, il n'est point en possession, & la regale est tousiours ouuerte. Ce sont les maximas les plus certaines que l'on ait au barreau.

L'Archidiaconé contentieux ayant vacqué au mois d'Auril 1630. au lieu que le defendeur se deuoit adresser au Roy, il s'en fit pouruoir par l'ordinaire le 25. du mesme mois, & au mois de Septembre ensuiuant il obtint vne autre prouision du mesme benefice en Cour de Rome (*per obitum.*) Or il est certain que les prouisions du defendeur sont nulles, pour ce que quand la regale est ouuerte, il n'y a que le Roy seul qui puisse conferer. *Ius enim regalia ossibus regis seu corone, ita coheret vt separari vel alteri competere numquam possit non magis quam opera officiales qua patrono debent à personâ patroni disungi non possunt* bald. in l. libert. ij. coll. de operis lib. Et Mr Ruzé en son traicté des regales, priuilege 44. *Collatio Papæ (dit-il) nihil operatur & semper vacabit beneficiū donec rex prouiderit.*

Donc la regale estant ouuerte à Carcassonne le defendeur se fit pouruoir dudit benefice par l'ordinaire & par le Pape, & le demandeur au contraire estimant que le benefice auoit vacqué en regale, en obtint la prouision du Roy en la mesme annee, & mesme mois que le defendeur en fut pourueu en Cour de Rome, sçauoir le 15. ~~Octobre~~ 1630. en vertu de laquelle prouision ayant pris possession le 12. Octobre ensuiuant, il a fait assigner Me François de Simeon au Parlement de Paris, seul iuge de la regale. Mais Me François de Baud estant venu à la trauerse, qui a requis le mesme benefice par indult, ayant fait assigner ledit Simeon defendeur au grand Conseil, à donné lieu au reglement des Iuges, & par Arrest l'affaire a esté retenuë au Conseil Priué, ou le demandeur espere que le Roy ne perdra pas vn droit si auguste & si important, qui doit faire loy pour toute la France, laquelle ne reconnoissant qu'un Roy, doit viure sous vne mesme loy, puis que ce droit de regale fait partie de la Couronne, & faut estre mauuais seruiteur du Roy pour reuoquer en doute cette verité.

